

*tu narium tuarum coaceruatæ sunt aquæ, Exod. 15. 8. & 10. & alibi, flauit spiritus tuus, vel flauisti vento tuo, & operuit eos mare, Exod. 14. 21. & alibi, de hoc vento loquendo, Iehoua mare ipsum Euro vehemente tota nocte abegit, & rededit mare ipsum in siccum; Porro etiam in Iob dicitur, Iob. 37. 9. egreditur frigus ab Arcturo seu septentrione, flante DEO concrefcit gelu, &c. Similiter quod ad ventorum naturam attinet, dicit Sapiens, Prou. 25. 23. quod ventus Aquilo dissipet pluuias: Psal. 135. 7. Et Psalmista regius ait, Depromit ventos è thesauris suis, & alibi, simul ac efflauit ventum suum, effluunt aquæ, Psal. 147. 16. Ex quibus sacri fontis locis colligimus quod meteora aquea cuiusmodi sunt nubes, pluuiæ, nix, grando, ac huiusmodi alia ex Arca cœli, seu spiritus mundani, seu aeris thesaurario seu sacrario depromantur, voluntate diuina, per ventos tanquam instrumenta ad hoc negotium ordinata, ita vt variare videantur meteora, secundum diuersam ventorum à variis mundi plagis flantium dispositionem: vt flante Borea niues, grando, & gelu: Austro nubes, pluuiæ: Euro, æstus & fulgur: Fauonio, nubes tenues producuntur, quæ omnia meteora ex substantia aeris, ventis illis opposito modo spirantibus & secundum ventorum dispositionem ab inuicem differentibus procreantur, quemadmodum suo loco perspicuius declarabitur. Ad meteororum autem ignitorum originem quod attinet, quam exhalatione à terra emissa factam crediderunt Peripatetici: certe si sacra Bibliorum scripta animaduertamus, originem ipsorum abstrusorem longe esse obseruabimus quam Philosophi vulgares somnauerunt, Nam in primis apud Leuiticum legimus, quod ignis seu coruscatio exiens à conspectu Iehouæ consumpsit in illo altari holocaustum, Leuit. 9. 24. Et capite sequenti, Exiens ignis à conspectu Iehouæ exanimauit filios Aharonis, vers. 2. imo vero & Deus ipse ignis consumens appellatur, Et alibi, ignem flammantem ipsius ministros vocari legimus Deut. 4. 24. Vnde & dictum est, quod ignis à Iehoua emissus consumpsit 250. illos viros, &c. Nu. 16. Et alibi, ignis DEI è cœlo decidens virtute spiritus Eliæ consumpsit Præfectum cum 50. suis. Et apud Iob inuenimus, Fulgura nunquid mittes, & ibunt, & reuertentia dicent tibi: adsumus: Iob. 38. 35. Denique in loco alio optime denotatur, quod meteororum ignitorum fons & origo ab illo ipso authore oriatur, vnde scriptum est, DEI sternutationibus splendet lux, & quidem oculorum veluti palpebræ auroræ, ex ore eius velut tedis prodeuntibus, scintillis ignis proripientibus sese. Ita è naribus eius prodit fumus, vt aheni feruentis quasi anhelitus eius carbonem accenderet, & flamma ex ore eius prodiret, Iob. 41. 18. vbi de fulmine intelligit. Et alibi, qua via itur vbi lux habitat, & qua nam est via qua in partes disilit lux dispergente Euro super terram? Iob. 38. 19. Quibus siquidem Biblij testimoniis docemur in primis, quod lucis & coruscationis, & consequenter omnium meteororum lucidorum, initium & origo sit valde secreta & abstrusa, & tam longe à philosophorum Veterum conceptionibus distans, (qui eorum ortum crediderunt fuisse à terra) quam dies est à nocte, lux à tenebris. Quis enim philosophantium negabit vnquam medium à principio potius habere suum initium quam à fine suo? Porro cum simplicia sint mixtorum initia, cur à terra corrupta & mista, cur à corpore opaco seu à posteriore, cur à principiato & non à principio deriuanda sunt meteora omnium magis essentialia, & non ab igne seu fonte lucido suæ naturæ conueniente? idque mediate, cur à frigido procreatur naturali partu illud quod est calidum? cum simile simili gaudeat, & simile à suo simili procreari soleat, Imo vero audacter pronuntiare possumus, quod si meteora humida ex aeris medii, seu mediæ spheræ humiditatis substantiæ tenuis compressione mediantibus duobus ventis fieri assoleat, multo magis meteora ignita materialiter à supremæ eiusdem elementi substantiæ compressione à ventis suauiter ibi concurrentibus elicientur, nam supremæ spheræ humiditatis portio nihil aliud est, quam ignis dissolutus & expansus, seu igneus aer; qui condensatione apparet in forma meteori igniti, cuius modi sunt cometa, columna ignea, & omnia meteora illa, quæ in suprema aeris regione gigni obseruantur, quorum materia est aer afflatu ventorum Iehouæ contractus, forma autem lucida est lux ignea, in cuius centro Iehouæ virtus inest non aliter quam in dumi ignei meditullio Moyfi apparebat: atque etiam in columna ignea, quæ præibat Israelitas nocturno tempore in deserto: Vestitur enim DEVS (vt testatur Psalmista) lumine tanquam vestimento: & teste Moyse, Ex ignea flamma locutus est Israelitis, Vnde & alibi, ignis nuncupatur consumens, quare valde difficilis est labor, & maximus ex laboribus Herculeis horum meteororum scaturiginem dignoscere nisi reuelatione sit detectum: Atque ob hanc rationem dixit vir patiens, qua nam est via qua in partes disilit lux dispergente Euro super terram? Qua via itur vbi lux habitat? Iob. 38. & vt Pagninus interpretatur; An nosti vbinam sit via qua diuiditur exhalatio quæ spargit ventum super terram? Si igitur ignea meteororum forma egreditur occulte ex conspectu Iehouæ, vti supra dictum habemus, si sternutationibus DEI splendet fulgur seu coruscatio, seu lux, si ex ore eius flamma veluti tedæ prodeunt & scintillæ ignis, si è naribus eius prodit fumus vt aheni feruentis, si anhelitus eius quasi carbonem accendit, Iob. 41. 18. certe longe sunt hæc occultiora, quam vt simplici fumo calido & sicco à terræ visceribus exhalato proueniant; Quis autem Christianorum mediocriter in rerum naturis versatus tam demens esse potest, qui vim tonitruorum ingentem, admirandam fulguris & fulminis potestatem, quæ gladium intacta vagina liquefacere, & vitam animalium ictu quasi oculi etiam intacto corpore tollere atque eripere solet, rei tam parui momenti, qualis est exhalatio terrestris salua conscientia attribuere possit? Quid enim plus egit ignis ille qui egressus est à conspectu Iehouæ? virtute cuius tum filij Aaronis, tum etiam 250. exanimati & vita orbati*